



UPA 2015/125

Tillie Martinussen

15. maj 2015

Tamat oqartussaaqataanerannut atugassarititaasut pillugit apeqquteqaat aallaavigalugu oqallissiamik siunnersuut. Ullumikkut aaqqissugaaneq tamat oqartussaaqataanerannik siuarsaasoq atuuppa, imaluunniit tamat oqartussaaqataanerannik nukittorsaataasunik pitsanngorsaasinnaavugut, innuttaasut peqataanerannut, kattuffiit peqataanerannut ilaasortallu inissisimanerannut naleqqiullugu.

(Inatsisartunut ilaasortaq Naaja H. Nathanielsen, Inuit Ataqtigiit)

Siullermik isumaqarpunga naqissusertariaqarlugu, maani nunami iluarusuutigisariaqaripput demokrateeqaratta. Nunarsuatsinni sumiiffippassuarni demokrati inuillu pisinnaatitaaffiig ataqqineqanngilluinnarput. Nunatsinni tamakku atuutinngillat.

Kiffaangissuseqarpugut oqaaseqarsinnaanitsinnut, kiffaangissuseqarpugut akerliussutsimik takutitsinissatsinnut, kiffaangissuseqarpugut kattuffeqarsinnaalluta. Taasisinnaavugut. Aamma kiffaangissuseqartunik arlaannaannullu attuumassuteqanngitsunik tusagassiuteqarpugut. Ataatsimut isigalugu Demokraatini isumaqarpugut, nunatsinni demokrati ingerlalluortoq.

Kisiannili imaangilaq pitsanngorsaasoqarsinnaanngitsoq, soorunami pitsanngorsagassaqarpoq. Demokraatini kissaatigaarput tusagassiutit isornartorsiusinnaanerunissaat. Taamaattumik aningaasanut inatsisissap isumaqatigiinniutiginerani sulissutigaarput tusagassiutinut tapiissutit 2014-mut naleqqiullugit allanngortinneqassanngitsut. Iluatsipparput. Tulliani sulissutigissuarput qaqileraluni tusagassiortarnissap aningaasaliiffiginsisaa. Taamaaliorniarpugut ullumikkut nunatsinni aaqqissuisoqarfiit tusagassiortumik qaammatini arlalinni qaqilerinermik suliaqartitsisinnaanngimmata

Aamma kissaatigaarput ammanerusumik ingerlatsisoqarnissaa, innuttaasut nakkutilliisinnaaqqullugit politikerit aningaasanik iluamik ataqqinnittumillu atuinersut. Taamaattumik kissaatigaarput Inatsisartuni pappiaqqat allattugaatit pissarsiarineqarsinnaalissasut, taamaaliornikkut periarfissaqartilerlugu Inatsisartut



inatsisartoqarfiullu aningaasartuutaasa kikkunnit tamanit takuneqarsinnaangornissaat aamma taamaasippat kikkut tamarmik paasiniaasinnaangussamata. Suliap tamatuma piviusunngortinnissaa massakkut sulissutigaarput, sakkortuumilli akerlilernerqarpugut maani inimi partiinit angisuunit, taakku isumaqarmata, ammasumik ingerlatsinissaq pisariaqanngitsoq. Uagut isumarput naapertorlugu tamanna uggornarpoq.

Taakkuugallarput Demokraatiniit oqallinnermut atatillugu oqaasererusutagut.